




ՀՈԳԵՎՈՐԱԿԱՆԱՑ ՀԱՄԱԳՈՒՄԱՐ ԱՄԵՐԻԿԱՅԻ ՄԻԱՑՅԱԼ ՆԱՀԱՆԳՆԵՐԻ ՀԱՅՈՑ ԱՐԵՎԵԼՅԱՆ ԹԵՄԻ

Վեհապատ Հայրապետի քարեհամ կարգադրությամբ և հրավերով Ամերիկայի Միացյալ Նահանգաց արևելյան թեմի առաջնորդ տ. Թորգոմ արքեպիսկոպոս Մանուկյանի, մայիսի 1—2 օրերին հոգևորականաց տարեկան համագումարին մասնակցեցին Մայր Աթոռից Պլովդիվի հայոց հոգևոր հովիվ տ. Մեսրոպ քահանա Բենիյանը և Երևանի ս. Սարգիս եկեղեցուց տ. Սարգիս քահանա Թաշչյանը:

Մայիսի 1-ին Նյու-Յորքի հայոց առաջնորդարանում տեղի է ունեցել ժողովի քացումը և դիվանի ընտրությունը նախագահությամբ առաջնորդ տ. Թորգոմ արքեպիսկոպոսի: Ժողովին մասնակցում են շուրջ 35 պատգամավորներ:

Երկու օրերի ընթացքում ըստ ծրագրի կարդացվում են հետևյալ դասախոսությունները:

1. Հայոց եկեղեցին արևելյան Եվրոպայում. տ. Մեսրոպ քհն. Բենիյան:

2. Պավլիկյանք. Սեզար սարկավագ Գոնորալյան:

3. Քահանայի նվիրական կոչումը Հայաստանում. տ. Սարգիս քհն. Թաշչյան:

4. Բոլեջի տարիներ և եկեղեցին. տ. Միքայել քահանա Բուդերո. անգլերեն լեզվով:

Յուրաքանչյուր դասախոսությունը լսվել է հետաքրքրությամբ:

Քահանա հայրերը այնուհետև պատասխանել են ներկյաների քազում հարցերին:

Հոգևորականաց համագումարը իր աշխատանքները ավարտում է երկու օրվա ընթացքում եղբայրական սիրալիր մթնոլոր-

տում: Մի շարք հարցերի շուրջ ընդունվում են համապատասխան որոշումներ:

Մայիսի 3-ից—4 օրերին Նյու-Յորքի հայոց ս. Վարդան Մայր եկեղեցում գումարվում է ԱՄՆ-ի հայոց արևելյան թեմի 72-րդ տարեկան պատգամավորական ժողով, որին ներկա են լինում նաև Մայր Աթոռի ներկայացուցիչները:

Ժողովում հոսունկայս ընթերցվում է այս առթիվ Ամենայն Հայոց Հայրապետի օրհնության և ողջույնի գիրը:

Ժողովում ողջույնի խոսքով հանդես է գալիս նաև տ. Մեսրոպ քահանա Բենիյանը և հաղորդելով Ամենայն Հայոց Հայրապետի ողջույններն ու օրհնությունները, հաջողություն է մաղթում ժողովի աշխատանքներին: Սույն թեմական պատգամավորական ժողովը արևելյան թեմի հայոց առաջնորդ է վերընտրում տ. Թորգոմ արքեպիսկոպոս Մանուկյանին:

Մայր Աթոռի ներկայացուցիչ հայրերը այնուհետև լինում են մի շարք քաղաքներում, հաղորդում են Հայոց Հայրապետի ողջույնները և օրհնությունները, ս. պատարագ մատուցում և հանին կենաց քարոզությամբ մխիթարում ժողովրդին:

Տ. Մեսրոպ քահանա Բենիյանը պատարագում և քարոզում է Նյու-Յորքի հայոց ս. Վարդան Մայր տաճարում, Ուոտրտաունի ս. Հակոբ եկեղեցում, Ֆիլադելֆիայի ս. Սահակ և ս. Մեսրոպ եկեղեցիներում և ապա Նյու-Յորքի ս. Խաչ եկեղեցում:

Տ. Սարգիս քահանա Թաշչյանը պատարագում և քարոզում է հետևյալ եկեղեցիներում,

Սպրիգֆիլդի հայոց եկեղեցում, Դետրոյտի հայոց ս. Հովհաննես եկեղեցում, Ռասթրի հայոց եկեղեցում և Նյու-Յորքի ս. Վարդան Մայր տաճարում:

Բացի այն եկեղեցիներից, որ մեր քահանա հայրերը պատարագեցին և քարոզեցին, նրանք ներկա են լինում ճաշկերույթների, որտեղ խոսում են եկեղեցասիրության, էջմիածնասիրության, բարեպաշտության, ինչպես նաև մեր վերածաղկող մայր հայրենիքի և այնտեղ խաղաղ ու բարօր ապրող մեր ժողովրդի պայծառ կյանքի մասին, շեշտելով, որ բաց են նաև հայրենի հողի վրա մեր աղոթքի տները, որոնց խորանների առաջ ամեն օր նախնյաց հավատով և երկյուղածորեն աղոթում են մեր ժողովրդի զավակները:

Քահանա հայրերը սիրով պատասխանում են ներկաների հարցերին: Արդարև թեև սփյուռքի բոլոր տարածքի վրա եկեղեցաշեն ու կրթանվեր կյանքով ապրում է մեր

հավատացյալ ժողովուրդը, բայց սփյուռքը կարող է գոյատևել ս. էջմիածնով և վերածնած հայրենի երկրի հանդեպ իր սիրով և հավատարմությամբ:

Քահանա հայրերը մասնավոր կարևորությամբ խոսում են նաև Տ. Տ. Վազգեն Ա Ամենայն Հայոց Վեհափառ Հայրապետի շուրջ քառամյա եկեղեցանվեր, հոգևոր, վանական, շինարարական, մշակութային, կրթական բեղուն գործունեության մասին, գործունեություն, որը հպարտությամբ և երախտագիտությամբ է լցնում յուրաքանչյուր հայ մարդու սիրտը:

Մայր Աթոռի ներկայացուցիչները վերադարձան լավագույն տպավորություններով, բերելով իրենց հետ և այն վկայությունը, որ ամերիկահայ մեր ժողովուրդը միշտ և ամեն տեղ ծարավի է Հայոց Հայրապետի և ս. էջմիածնի օրհնության և հայրենիքի ջերմացնող շնչին:

